



Uunga
Paneeraq Olsen
Inatsisartunut ilaasortaq
Naleraq

**Erninermi sulinngiffeqartarneq pillugu § 37 naapertorlugu apeqqummut akissut
(230-2022)**

Brevdato: 24-01-2023
Sagsnr. 2023 - 223

Asasara Paneeraq Olsen

P. O. Box 1037
3900 Nuuk
Tel. (+299) 34 50 00
Fax (+299) 34 63 50
E-mail: oed@nanoq.gl
www.naalakkersuisut.gl

Aallaqqaasiullugu apeqqutitut nassiussannut pineqartumullu soqutiginninnerit
qujassutigissavara.

Tulliuttuni § 37 naapertorlugu apeqqutitut akivakka.

**1. Naalakkersuisut oqaaseq "akissarsiat nalinginnaasut" qanoq
nassuiarsinnaavaat?**

Aallaqqaasiullugu isumaqatigiissutit tamakkerlutik naartunermi, erninermi
meeravissartaanermilu sulinngiffeqartarneq ullormusiaqartarnerlu pillugit Inatsisartut
inatsisaat nr. 14, 7. december 2009-meersumut innersuussinnginnerat
oqaatigineqassaaq. Taamaalilluni isumaqatigiissutit arlallit maanna 2020-mit inatsit
nutaajunermut innersuussipput. Taamaalilluni immikkoortuni ukunani isumaqatigiissutit
amerlanerpaat innersuussipput: SIK, PPK (Peqqinnissaqarfimmi sulisut) aamma DSA
(De samforhandlende Akademikerorganisationer).

Pisortani sulisut inatsisit naapertorlugit sulinngiffeqarnissamut pisinnaatitaaffeqarput. Illit
uparuaanertut piffissani sorlorni sulisup *nalinginnaasumik aningaasarsiaqarnissamut*
pisinnaatitaaffeqarnera isumaqatigiissutini maleruagassiorneqarpoq.

Oqaaseq *nalinginnaasumik aningaasarsiat* tunngaviusunik aningaasarsianut
aalajangersimasumillu tapisianut tunngavoq. Sulisartup upalungaarsimanissamut
tapeqartup, atorfeqaannartitsinermi tapeqartup il.il., piffissami sulinngiffeqarnermi taakku
tigusassagai tamatuma nassataraa.

a. Tunngaviusumik akissarsiat tassaappat nalinginnaasumik akissarsiat?

Apeqqut 1-imut akissut takuuk.

b. Tassaanerluni tunngaviusumik akissarsiat tapit ilanngullugit?

Apeqqut 1-imut akissut takuuk.

i. Angerneruppat, tapit suut pineqarpat?

Aallaavittut tapit tamarmik sulisup qaammatit tamaasa
aalajangersimasumik pisartagai pineqassapput. Taakku
tassaasinnaapput immikkut siunnersortimut tapisiat,
suliartoqquneqaratarsinnaanermut tapisiat, atorfimmu immikkut ittumut
tapisiat il.il.

ii. **Tapit tamarmiunerlutik imaluunniit tapit ilaat?**

Apeqquut 1-imut kiisalu apeqquut 1b nr. i-mut akissutit takukkit.

2. Naalackersuisut qanoq ilillutik kommunit Naartunermi, erninermi meeravissartaarnermilu sulinngiffeqarneq pillugu inatsisaat nutaaq malinneraat qulakkeersinnaavaat?

Isumaginninnermut, Suliffeqarnermut Nunamullu Namminermut Naalackersuisoqarfik ima akissuteqarpoq:

“Naartunermi, erninermi meeravissartaarnermilu sulinngiffeqartarneq pillugu Inatsisartut inatsisaanni nr. 5, 19. november 2020-meersumi § 55-imi ima allassimasoqarpoq:

”§ 55. Inatsisartut inatsisaat manna malillugu imaluunniit Inatsisartut inatsisaat manna malillugu maleruaqqusat tunngavigalugit kommunalbestyrelsinit aalajangiinerit isumaginnittoqarfiup aqunneqarnera aaqqissuussaanelu pillugit inatsisiliomerit qaqugukkulluunniit atuuttut naapertorlugit Isumaginninnermi Naammagittaalliuuteqartarfimmut naammagittaalliuutigineqarsinnaapput.”

Taamaalilluni inatsit malillugu kommunalbestyrelsip aalajangigai Isumaginninnermi naammagittaalliuuteqartarfimmut naammagittaalliuutigineqarsinnaapput, takuuk isumaginninnermut aqutsisoqarfik taassumalu aaqqissugaanera pillugu malittarisassat atuuttut. Tamanna pillugu inatsit Isumaginnittoqarfiup aqunneqarnera aaqqissuussaanelu pillugit Inatsisartut peqqussutaat nr. 11, 12. november 2001-imeersumi kiisalu kingusinnerusukkut 2016-imi 2017-imiilu allannguutit kiisalu taakkununga atasumik nalunaarutit.

Kommunit aqunneqarnerat pillugu Inatsisartut inatsisaat nr. 29, 17. november 2017-imeersoq naapertorlugu Nakkutilliisoqarfik kommunit inatsisit atuuttut naapertorlugit pisussaaffimminnik ingerlatsinerannik nakkutiginnittuuvoq.

Isumaginninnermi suliassaqarfimmi nakkutilliisarneq pillugu Namminersorlutik Oqartussat nalunaarutaat nr. 49, 31. august 2021-meersoq naapertorlugu Naalackersuisut qitiusumik nakkutilliinermik ingerlatsivia (Nakkutilliinermik ingerlatsivik) kommunalbestyrelsip ingerlatsineranik aamma inunnik isumaginninnermut inatsisinik aqutsineranik nakkutilliisuuvoq, tassungalu naartunermi, erninermi meeravissartaarnermilu sulinngiffeqartarneq ullormusiaqartarnerlu pillugit Inatsisartut inatsisaat ilaavoq.

Kommuninut qinersinemi 2017-2021-mi Nakkutilliisoqarfiup inatsimmi suliassaqarfiit uku nakkutigivai: 1) Meeqqanut tapersiinnermi suliassaqarfik, 2) Siusinaartumik utoqqalinersiaqarnermi suliassaqarfik kiisalu 3) Meeqqanut tapiissutit aamma Ineqarnermut tapiiffiqineqarnissami suliassaqarfik. 2021-mit Nakkutilliisoqarfik kommunit innarluutilinnik tapersersuinnermi suliassaqarfimmik ingerlatsineranik aamma allaffissorneranik nakkutiginnippoq, tamatumalu kingorna ukiut tulluuttuni Nakkutilliisoqarfik utoqqalinersiaqarnermi suliassaqarfimmik aamma kommunit utoqqarnik paaqqinninnermi suliassaqarfianik nakkutiginnissasoq naatsorsuutaavoq.”

3. Ukiut tallimat kingullit qassit meerartaarnermut atatillugu sulingiffeqarnermi ullormusiaqarsimappat?

Akissut tulliuqqat Meeqqanut, Inuusuttunut Ilaqutariinnullu Naalakkersuisoqarfik suleqatigalugu suliarineqarpoq.

Erninermit atatillugu ullormusianik tunniussineq kommunit akisussaaffigaa, Naartunermi, erninermi meeravissiaartaarnermilu sulingiffeqartarnerq pillugu Inatsisartut inatsisaat nr. 5, 19. november 2020-meersup § 43-ani allaqqavoq.

Aningaasanut inatsimmi kontu pingaarneq 31.03. 36 Erninermi ullormusiat (siusinnerusukkut kontu pingaarneq 30.10.36) suliassami kisitsisit tulliuqqat allassimapput:

Nalunaarsuiffik 1

(Naatsorsuutit) Piffissami 2018-2022 decembarimi erninermit ullormusianut suliassami kisitsisit

Ukioq	Angutit	Arnat	Katillugit
2022*	201	860	1.061
2021	148	834	982
2020	201	860	1.061
2019	188	842	1.030
2018	183	831	1.014

* Suliassami kisitsisissatut naatsorsuutigisat

Kommunit ataasiakkaat erninermit ullormusianik tunniussisarnermik ingerlatsisuummata, Naalakkersuisut arnat/angutit ataasiakkaat sumi atorfeqartuunerannik ataatsimut naatsorsuutinik peqanngillat.

a. Namminersorlutik Oqartussani sulisut qassiuppat?

Namminersorlutik Oqartussani atorfeqartoq erninerup nalaani sulingiffeqarsinnaanermik atuigaangat, taamaattoq nalinginnaasumik aningaasarsiaqarnissamik pisinnaatitaaffeqarnani, pineqartoq suliffimminit aningaasarsiaqartinneqarnani sulingiffeqartarpoq. Pineqartoq erninerup nalaani ullormusianik qinnuteqarsimanera pillugu sulisitsisoq ilisimatinneqarneq ajorpoq.

Tamatuma saniatigut apeqqut 3-mut akissut takuuk.

b. Kommuunini sulisut qassiuppat?

Apeqqut 3-mut akissut takuuk.

c. Namminersorlutik inuussutissarsiutillit sulisut qassit?

Meeqqanut, Inuusuttunut Ilaqutariinnullu Naalakkersuisoqarfik tulliuqqat paasissutissiivoq:

"Ulloq 1. januar 2021 aallarnerfigalugu ilaatigut suliffeqarfinni namminersortuni sulisunut erninerup nalaani sulingiffeqartarnermut aningaasaateqarfik atuutilerpoq. Naartunermi, erninermi meeravissiaartaarnermilu sulingiffeqartarnerq pillugu Inatsisartut inatsisaat nr. 5, 19. november 2020-meersumi § 37, imm. 1 naapertorlugu meerartaarnermut aningaasaateqarfik kingusinnerpaamik 1. april ukiumoortumik nalunaarummik nassitsisassaaq. Nalunaarut ilaatigut paasissutissanik akiliutigineqartunik naatsorsoqqissaakkanik, tamatumunnga ilanngullugu ukiumi

qaangiuttumi ingerlatsivinnut, suaassutsimut piffissanillu sulinngiffeqarfiusunut sapaatip akunnikkaartumik agguakkanik imaqassaaq. 2021-mut ukiumoortumik nalunaarut tunuliaqutaralugu Meerartaarnermi aningaasaateqarfik Amaat tullittunik paasissutissiivoq:

Nalunaarsuiffik 2

Piffissami 1. juli – 31. december 2021 meerartaarnermi ullormusianut suliassami kisitsisit

Angutit	Arnat	Katillugit
18	41	59

Meerartaarnermut aningaasaateqarfik aatsaat ulloq 1. juli 2021-mi atulerpoq, taamaammallu siusinnerusukkut kisitsisit pigineqanngillat. 2022-mut ukiumoortumik nalunaarut sulii tunniunneqanngilaq, taamaammallu 2022-mut kisitsisit sulii pigineqarnatik.”

Tamatuma saniatigut apeqqut 3-mut akissut innersuussutigineqarpoq.

Inussiarnersumik inuulluaqqusillunga



Naaja H. Nathanielsen